

# L'ustiera dal «Jakob» a Rapperswil discorra rumantsch

Turitg, Gstaad, Zermatt, Mac Donalds èn stads las staziuns da lavur dad Yvonne Berther

DA CLAUDIA CADRUVI / ANR

■ **Yvonne Berther è creschida si a Langnau am Albis. Tuttina discorra ella rumantsch da Medel sc'ina pirla. Da preschent maina ella il «Jakob» a Rapperswil.** Il hotel «Jakob» sa chatta amez la citad veglia da Rapperswil, gist sin il grond plaz sut il chastè. Là sa cruschian duas sendas da peleginadi che mainan a Santiago de Compostela en Spagna. Perquai han ils dus possessurs che han renovà avant sis onns il vegl «Freihof» dà a quest hotel istoric il nov num «Jakob».

Dapi intgins mais maina *Yvonne Berther* il hotel. Cunzunt dis da bell'aura la stad èn adina tuttas maisas avant il «Jakob» occupadas. Betg da smirvegliar: La piazza sulada è circundada da bellas fassadas, i n'ha nagin traffic, ed il café che l'ustaria porscha è ina delicatessa ch'ins na survegn betg dapertut.

## Manà filialas da Mac Donalds

Berther ha 36 onns ed è versada en la gastronomia. Cumenzà ha ella cun in emprendissadi da cuschiniera a Turitg. «Sco usità hai jau lavurà en differentas cuschinas, p. ex. a Gstaad», raquinta ella.

Suenter ha ella fatg il diplom d'hotellaria ed è danovamain ida sin tura per rimnar experientscha en hotels da vacanze a Zermatt ed Arosa. Lura è ella turnada en la regiun da Turitg ed ha surpiglià filialas da Mac Donalds a Rapperswil e Volketswil.

## Tge è il positiv en la gastronomia?

«En il Mac Donalds sa drizzan ins tenor il sistem american. Ma qua en il 'Jakob' ston ins chattar sia atgna via», emprova Berther da declerar la differenza tranter il Mac Donalds e sia lavur dad ussa. Ma l'ustiera di era ch'i dettia parallels: «La finala ston ins adina vender insatge.»

Tge che plascha ad ella en la gastronomia è: «Ins ha contact cun la glieud. D'ina vart cun il personal, da l'autra vart cun ils giasts. Ed ins na sa mai tge ch'è damaun. La damaun fan ins in plan, e la saira han ins tuttina fatg insatge tut auer che quai ch'ins vuleva.»

Era sch'ella è la manadra dal hotel na lavura ella betg sulet en recepziun e sin biro. Sch'i fa da basegn dosta ella giu maisas e gida dapertut nua ch'i sto esser. Berther na disturbi insumma betg ch'el-



La macchina da café luxuriosa è l'attracziun dal «Jakob» che Yvonne Berther maina dapi quest onn.

FOTOS C. CADRUVI

la ha darar liber la dumengia. Anzi, damai ch'ella è ina alpinista passionada gauda ella d'avair liber cura che auters ston lavarar. «Lura n'hai betg tanta glieud d'enturn.»

## Glieud da fatschenta e da nozzas

«90 pertschient da noss giasts da hotel èn glieud da fatschenta», di Berther. Il rest èn hosps da nozzas, pelegrins e turists. A Rapperswil cun ses chastè e sia bella promenada sper il lai vegn savens fatg grondas nozzas. Malgrà ch'il «Jakob» na pos-

seda betg ina gronda sala, profitescha el tuttina da nozzas che han lieu en il hotel da luxus giu sper il lai. Tscherts hosps vegnan numnadamain pli gugent a dormir en il «Jakob» ch'è pli favoravel e pli modern.

«Nus avain in flair mediterran», di l'ustiera. L'entir di pon ins sa servir al pitschen buffet d'antipasti. Davos la bar è postada ina «Electra» – quai è il rolls roys da las maschinas da café. Cun questa macchina luxuriosa fa il «Jakob» cafés ch'ins survegn per ordinari be en l'Italia. Autras

spezialitads da la chasa èn: Il tschaler da vin ch'è adina avert per tut tgi che vul guardar, ils concerts da jazz duas giadas il mais, e dapertut en chasa è pussaivel l'access a l'internet per ils hosps da business.

## Pelegrins na vegnan betg pli a pe blut

Il «Jakob» è registrà en ils guids per pelegrinadis a Santiago de Compostela. Ils pelegrins pon vegnir en il hotel e laschar far in bul en lur attest da pelegrinadi. «Davent da Rapperswil van ins anc tschient dis a pe fin a Santiago de Compostela», di Berther. Blers pelegrins fetschian il viadi dentant en etappas.

Aposta per ils pelegrins datti en il «Jakob» l'entir di suppa chauda. En l'ustaria hai era ina fontauna a la quala minga giast po sa servir e baiver tant aua da spina sco el vul.

E co vesan ils pelegrins d'ozendi ora? Van els anc adina a pe blut e cun in fist lung? «Na, els vesan ora sco outra glieud che va a viandar», di Berther. «Blers pendan ina conchiglia (Jakobsmuschel) vid il satgados. Quai è l'ensaina ch'els van a Santiago de Compostela. Be paucs van anc cun in fist.»

## Curt e bun

*Naschida:* ils 30 da mars 1968  
*Lieu da burgais:* Mustér  
*Creschida si:* Langnau a. Albis  
*Domicil:* Gommiswald SG  
*Spaisa preferida:* coccas da truffels  
*Bavronda preferida:* vin cotschen  
*Hobis:* ir per la pizza  
*Sport:* biken, turas da skis

